

*Exemplum.**Avisi auti de Andernopoli,  
de dì 5 Marzo 1520.*

Come novamente erano venuti infiniti messi con gran furia a significar esser sublevate da persone 10 milia tra l'Amasia et Tochato, quali se aveano facti rebeli et messi in campagna contra el Signor turco. Alcuni dicevano el capo de quelli esser de Soffi, over aver intelligentia con lui. Et come già erano stati a le mano *cum* alcuni sanzachi, quali avendo maltractati andavano multiplicando, et pareano tender a la volta de Soffi; per il che de li se monstravano gran furie et parevano mezi in fuga, et tanto più per lui che temeno de christiani et ogni zorno venivano diverse nove de l'armata de Spagna.

Come facevano gran provision de passar in Natolia, et se metevano in ordine; et el Signor *cum* i bassà dovevano andar a dimorar, per quanto se intendeva, questo anno in l'Amasia, et non se spengerà più avanti si la forza non lo astringe.

Come el Signor tureho havea creato novo bassà Ferchat, che era belarbei di la Grecia, zoyene de anni 30, di nation dalmata, persona de bona estimation in l'arte militar, et in loco del dito è stà posto beylarbei de la Grecia quel che era miriachur, zoè maistro de stala del Signor, che avea auto el sanzachato di Nicopoli.

Come li sanzachi de la Grecia avea auto comandamento de ridurre a quelle bande. *Item*, Ferchat novo bassà dovea partir el seguente zorno *cum* 3000 janizari, 3000 spachi da la Porta et altre gente per andar contra li sublevati.

Come el Signor turco, per quello se affermava, fra 8 o 10 zorni dovea partir de li, et mandava ambascadori a' tartari. Risonava *deinde* el signor Soffi esser potentissimo, et che l'era per spingersi avanti verso quelle bande. L'armata se andava conzando; non si pensava però sia per ussire si forza non astringe a farlo.

Per relation de persona degna de fede, parti da Constantinopoli a di do de Marzo, et de Andernopoli a di 6, dice haver visto galie 160 tra grosse et solil conze et in ordine, con tutti i preparamenti necessarii de armizii, fino ai piombi, ai remi.

Referisse apresso, come l'havea inteso come el Signor tureho havea facto morir el capitano de la

sua armata, qual mò do anni fo fuora *cum* dicta armada.

*A dì 7, fo il Sabato Santo.* La Signoria fo in chiesa a messa, vicedoxe sier Andre Baxadona, con li oratori Papa, Ferrara, et Mantoa; et da poi si reduce Colegio per lezer *lettere di Ragusi, di 27 Marzo, di Jacomo Zulian*, qual manda *lettere dil Baylo nostro da Constantinopoli* di questo tenor qui soto scritto. Et fo con li Cai di X expedito lettere in Franza, con mandarli ditti sumarii di Constantinopoli et di Roma.

*Di sier Tomà Contarini baylo nostro fo lettere aduncha date in Andernopoli a dì 4 et 5 Marzo.* Come el Signor tureho havia fato bassà uno chiamato . . . di nation di Sibinico; et perchè quel bassà era a le frontiere dil Sophi si ha esser ritrato, perchè alcuni populi erano sussitadi e dato qualche rota a li turehi erano a quelli confini, el Signor feva cavalchar a quella volta 3000 spachi et 3000 janizari con el dito bassà nuovo; di armata, che la era in ordine ma non si parlava di ussir.

*A dì 8, fo el zorno di Pasqua.* La Signoria fo con li oratori in chiesia a la messa.

Da poi disnar, predichoe fra' . . . . ., predicha a 237\* a San Francesco di la Vigna, e poi la Signoria *de more* andoe a vespero a San Zacharia, dove è il perdon; et cussi come prima si consuetava portar le cerimonie, per non vi esser il Doxe, non vi va se non li stendardi et bombe. Et prima la Signoria sentava in choro; hora ch'è fato questa partison di monache Conventual et Oservante, è stà preparato a sentar la Signoria di fuora in chiesa, cossa nova et ne ho voluto far nota. Et questo fo perchè le Conventual voleano andasse a sentar dentro, et le Observante volseno li de fuora; et cussi el Patriarcha volse et sentono. Era vestito sier Andrea Baxadona di veludo cremexin con tre Procuratori *solum*: sier Domenego Trivixan el cavalier, sier Andrea Gritti e sier Alvixe Pixani vestito di scarlato, che più non è stato con color poi è Procurator. Eravi drio li oratori, domino Francesco Marzelo episcopo di Traù, qual volse venir a la predica per udir il suo frate, per esser *etiam* lui stato frate di San Francesco. Li cavalieri aveano bechetti d'oro: sier Alvise Mocenigo consier, sier Andrea Badoer, sier Zorzi Pixani, sier Polo Capelo; e sier Andrea Trivixan et altri veste di seda e di scarlato. L'ultimo fu sier Francesco Contarini savio a Terra ferma, di veludo alto

(1) La carta 236\* è bianca.